

ছবি যখন গান কবিতা নাটক কিংবা জ্বালাময়ী ভাষন হয়

বেলাল বেগ

সংবাদটি পেয়েই খাড়া হয়ে গেলাম ছুটতে, কখন কোথায় দেখব? প্রথমেই মনে এল তার কথা। তার দীর্ঘ সুঠাম পৌরুষ দেহটির ভূষণ কি হবে সেদিন? শর্ট-পরা মেক্সিকান? টেক্সাস কাউবয়? সেলাওয়ার-কূর্তা-কাবুলি পরা পাঠান? রাবীন্দ্রিক? নজরুলীয়? জরিদার বলিউড পাঞ্জাবী? সারা গায়ে অলঙ্কার? সেদিন সে কি নিজের লেখা কবিতা শোনাবে তার দরাজ কণ্ঠে? নাকি নিজের সিডি থেকে নিজের লেখা ও সুর করা গান শোনাবে? নাকি বাংলাদেশের সকল আঞ্চলিক ভাষায় রবীন্দ্র সংগীত শোনাবে? সে কি অনর্গল কৌতুক বলবে? হয়ত বা একটু অভিনয়ও দেখাবে। তাজুল ইমাম মানুষের সংগ পেলে কি করবে কেউ বলতে পারবে না হয়ত বা সে নিজেও। যে লোকটি মানুষ ও মাটিকে ভালবেসে যুদ্ধে যায় আত্মত্যাগ দিতে, তার সম্বন্ধে রবীন্দ্রনাথের ভাষায় একটা কথা সহজেই বলা যায় " অলৌকিক আনন্দের ভার বিধাতা যাহারে দেন, তার বক্ষে বেদনা অপার "।

প্রাক-প্রদর্শনী পেইনটিংগুলি দেখতে গিয়েছিলাম তার বাসায়। ওরে আল্লাহ! কে কল্পনা করেছিল কেবল আমাদের দু'একজনের দেখার আনন্দের জন্য সে তার বিভিন্ন আকারের তেলরঙ, জলরঙ, এক্রাইলিক মাধ্যমে সদ্য আঁকা ৪০টি ছবিকে দেয়ালে পেরেক ঠুকে ঠুকে তার বাড়ীর পেছনের আঙ্গিনায় ছড়িয়ে ছিটিয়ে সাজিয়ে একটি অভিনব ওপেন-এয়ার প্রদর্শনীর আয়োজন করবে! গত দুমাস ধরে আহার-নিদ্রা ভুলে অবিরাম ছবি আঁকার পর একা একা এ অমানুষিক পরিশ্রম! কিছুই আসে যায় না অস্ত্রহাতে যুদ্ধ করা এ কঠোর পরিশ্রমী মুক্তিযোদ্ধার। সে যা চেয়েছিল ঠিক তাই ঘটেছে। পার্ক করা গাড়ীটির পেছনে যাওয়া মাত্রই বহু রংয়ের নৈসর্গিক দীপ্তি নিয়ে এক খন্ড আনন্দের আকাশ বাক করে চোখ দখল করে ফেলল। এটাই তাজুল ইমাম। তার বাড়ীর আঙ্গিনায় কখনও সিলেটের জৈন্তিয়া পাহাড় এসে দাঁড়ায় মৌন গভীর সৌন্দর্য নিয়ে, কখনো আমেরিকার সভ্য মানুষদের হাতে বন্দী নিসর্গ। কখনো ধ্যানী বকের সারা গা জুড়ে জীনান্দদাস, এমনকি নোংরা জলেও প্রকৃতির উজাড় করা রঙের মাতামাতি। তাজুল ইমাম প্রকৃতির গভীর অন্তরে গিয়ে নিজেকে আবিষ্কার করেছেন। প্রকৃতির মনুষ্য প্রাণীর স্বাভাবিক অধিকারে বাধা দিলেই মানবমন ক্ষিপ্ত হয়, ওঠে প্রতিবাদ, ঝরে রক্ত। সে কথাও বলেছেন তাজুল ইমাম যখন তিনি শ্রদ্ধা জানান মুক্তিযোদ্ধাদের কিংবা কবি শামসুর রাহমানকে। তাজুল ইমাম রঙ ও তুলির একজন দক্ষ কারিগর। তাঁর প্রকাশ ভঙ্গি কত সহজ রবীন্দ্রনাথ বলেছেন, " সহজ কথা কইতে মোরে কহ যে, সহজ কথা যায় না বলা সহজে "।

আমার দৃঢ় বিশ্বাস তাজুল ইমামের এ প্রদর্শনী দর্শকদের মন জয় করবে।